

**आकाशवाणी**

खास-खास खबरां:-

- भारत ए.आई इम्पैक्ट शिखर सम्मेलन अज्जै थमां नमीं दिल्ली दे भारत मंडपम च शुरु होग। एहदे च 20एं मुख्यें दे विश्व नेता शामिल होगंन।
- प्रधानमंत्री नरेन्द्र मोदी होरें आखेया ऐ जे भारत गी सुरक्षा चुनौतियें कन्नै निब्वडने लेई हर बेल्लै तयार रौहना होग।
- चुनावs आयोग नै पच्छम बंगाल च अनियमितताएं दे केई आरोपें पर 7 सहायक निर्वाचन पंजीकरण अधिकारियें गी मुअतल करी दिता ऐ।
- अमरीका दे राष्ट्रपति डोनाल्ड ट्रम्प होरें आखेया ऐ जे नमें खडरे गेदे शांति बोर्ड दे सदस्यें- गाजा दे परतियें निर्माण लेई 5 अरब डालर देने दा वादा कीता ऐ।
- मर्दे दे आई.सी.सी. टी-20 विश्व कप च कल कोलम्बो च खेडें गेदे मुकाबले च- भारत नै पाकिस्तान गी 61 रन्जें कन्नै हराइयै सुपर-8 च अपनी थाहर पक्की करी लैती ऐ।



**World Leaders -India AI Summit**

नमीं दिल्ली दे भारत मंडपम च अज्जै थमां शुरु होआरदे भारत- AI इम्पैक्ट शिखर सम्मेलन च 20 कोला मते मुख्यें दे नेता शामिल होने जा'रदे न। 5 दिन दे इस सम्मेलन च शामिल होने जा'रदे प्रमुख नेताएं च फ्रांस दे राष्ट्रपति इमैनुअल मैक्रों- ब्राजील दे राष्ट्रपति लूला डी सिल्वा- स्पेन दे राष्ट्रपति पेद्रो सांचेज़- स्विट्जरलैंड दे राष्ट्रपति गे परमेलिन- नीदरलैंडस दे प्रधानमंत्री डिक स्कूफ- मारीशस दे प्रधानमंत्री डा. नवीन चन्द्र रामगुलाम- श्रीलंका दे राष्ट्रपति अनुरा कुमारा दिसा नायके सेशल्स दे उपराष्ट्रपति सेबा स्टियन पिल्ले ते भूटान दे प्रधानमंत्री शेरीन तोगबे शामिल न।

विदेशमंत्रालय नै इक ब्यान च आखेया जे सम्मेलन च बोलिविया- क्रोएशिया-फिनलैंड- ग्रीस- ग्याना- कजाकिस्तान- लिस टैनस्टेन सर्बिया ते स्लोवाकिया दे प्रतिनिधि बी शामिल होगंन। एहदे इलावा एहदे च 45 कोला मते मुख्यें दे प्रतिनिधि बी शामिल होगंन। सम्मेलन दी चर्चा च संयुक्त राष्ट्र महासचिव ते केंई अंतराष्ट्रीय संगठनें दे अधिकारी बी हिस्सा लैगंन। संयुक्त अरब अमीरात दे शिष्टमंडल दी अगुआई अबुधाबी दे शहजादें खालिद बिन मोहम्मद बिन जायद अल निहान होर करंगन। इस सम्मेलन दा मकसद भलेया अज्जै-कल्लै दियें आधुनिक तकनीकें च अंतराष्ट्रीय सहयोग बी बधाना ते कूटनीति भ्याली गी मजबूती देना ऐ।



### **PM India -AI Expo 2026**

प्रधानमंत्री नरेन्द्र मोदी अज्ज नमीं दिल्ली च इंडिया ए.आई. इम्पैक्ट प्रदर्शनी दा उदघाटन करगंन। 5एं दिनें दी इस प्रदर्शनी दा आयोजन इंडिया ए.आई. इम्पैक्ट शिखर सम्मेलन दे कन्नै कीता जा'रदा ऐ। एहदे च आस्ट्रेलिया- जापान- रुस- ब्रिटेन- फ्रांस- जर्मनी- इटली- नीदरलैंड- स्विट्ज़रलैंड- सर्बिया- एस्टोनिया- ताजिकिस्तान ते अफ्रीका सनें 13 मुख्यें दे पंडाल होगंन। प्रदर्शनी च बक्ख-बक्ख खेतरें च आर्टिफीशल इंटेलिजेंस दे बड़े बड़े असर गी उजागर करने ते भविष्य दियें कारवाइयें पर चर्चा लेई 500 शा मते सत्र आयोजित कीते जागंन। इंडिया ए.आई इम्पैक्ट प्रदर्शनी च अंतराष्ट्रीय प्रतिनिधियें सनें ढाई लक्ख शा मते लोकें दे औने दी संभावना ऐ।



### **PM Interview**

प्रधानमंत्री नरेन्द्र मोदी हो'रें आखेया ऐ जे भारत गी सुरक्षा चुनौतियें कन्नै निब्वडने लेई हर बेल्ले त्यार रौहना होग। इक समाचार एजेंगी गी दिते गेदे इंटरव्यू च श्री मोदी हो'रें आखेया जे रक्षा सुधारें दे इक दहाके दे लाह- आपरेशन सिंदूर दे दरान साफ तौरा पर नजरी आए न।

प्रधानमंत्री होरें आखेया ऐ जे इस बरे केन्द्री बजट च रक्षा खेतर लेई 7 लकख 85 जहार करोड़ रपे रक्खे गेदे न- जेहड़े पिच्छले बरे दे बजट कोला कोई 15 फीसद मते न। उ'नें आखेया जे एह कुसै बी मंत्रालय जां मैहकमे गी दिता गेदा हुनै तगर दा सब्भनें शा बड्डा हिस्सा ऐ। श्री मोदी होरें अगले दहाके लेई 3 प्राथमिकताएं दा जिक्र कीता ऐ- जिंदे च होर मते ढांचागत सुधार- नमियें काहड्डें गी प्रोत्साहन देना ते शासन बवस्था गी सखल्ला बनाना शामिल ऐ। उ'नें आखेया जे उं'दी सरकार दी सुधार एक्सप्रेस कन्ने आम बसनीके गी व्यापक लाह मिला करदा ऐ।

<><><><><><>

#### EC-WB

भारती चुनां आयोग नै पच्छम बंगाल च अनियमित्ताएं दे केई आरोपें पर 7 सहायक निर्वाचन पंजीकरण अधिकारियें गी मुअत्तल करी दिता ऐ। इंदे च कैनिंग पुरबा थमां 2 ते सूती-मैनागुरी- शमशेरगंज- देबरा ते फरक्का निर्वाचन हलके थमां 1-1 अधिकारी शामिल न। आयोग नै राज्य दी मुख सचिव नंदिनी चक्रवती होरें गी चिट्ठी लिखियै एकडे 7 अधिकारें खलाफ कारवाई दा निर्देश दिता। चिट्ठी च साफ तौर पर आखेया गया ऐ जे मतदाता सूची दी नज़रसानी आली प्रक्रिया च शामिल इनें अधिकारियें खलाफ आरोपें दे सबूत मिले न। तौंआई सर्वोच्च अदालत दे 9 फरवरी दे निर्देश दी पालमा च चुनां आयोग नै SIR प्रक्रिया कन्ने सरबंधत च सब्भनें ऐतराजें दे नबेड़े दे सरबंधे च सख्त संदेश जारी कीता ऐ। राज्य दे मुख निर्वाचन अधिकारी होरें गी लिखी गेदी इक बखरी चिट्ठी च आखेया गया ऐ जे पेश कीते गेदे सब्भै फार्म-7 फौरी तौर पर सरबंधत ERO ते AERO गी भेजे जाने लोइचदे न।

<><><><><><>

#### Trump -Gaza

अमरीका दे राष्ट्रपति डोनाल्ड ट्रम्प होरें आखेया ऐ जे नमें खडेरे गेदे शांति बोर्ड दे सदस्यें गाज़ा दे परतियै निर्माण लेई 5 अरब डॉलर देने दा वादा कीता ऐ।

उ'नें अंतराष्ट्री स्थिरता ते पुलसबलें लेई ज्हरां-बददे कर्मियें गी खिते च भेजने दी अपनी वचनबद्धता फही पक्की कीती ऐ। उ'नें आखेया ऐ जे बोर्ड दे सदस्य वीरवारें- वांशिगटन च होने आहली पैहली बैठक च हिस्सा लैगंन। तोंआई इंडोनेशिया दी सेना नै आखेया ऐ जे मनुक्खी ते शांति मिशन दे तैहत गाजा च संभावित तैनाती लेई जून महीने दे अखीरै धोड़ी ओहदे लेई 8 ज्हार सैनिक त्यार होई जाने दी संभावना ऐ।

<><><><><><>

### **Amit Shah-Cooperation Ministers**

सहकारिता क्षेत्र च प्रमुख सुधारें ते विस्तार योजनाएं दी समीक्षा लेई कल मंगलवारें गुजरात दे गांधीनगर च सब्भनें राज्यें ते केन्द्र शासत प्रदेशें दे सहकारिता मंत्रियें दी इक उच्ची सतह दी बैठक लग्गोग। इनें योजनाएं च मुख्य भरै च प्रस्तावित दंडु लक्ख नमीं सहकारिता समीतियें दी स्थापना बी शामिल ऐ। एह इक चाल्ली दी “मंथन बैठक” होग- जेहदे च सारे किट्ठे बेइयै विचार-बटांदरा करगंन ते भविक्ख दी रुपरेखा गी मुकदा रुप देगंन। बैठक दी अध्यक्षता केन्द्री सहकारिता मंत्री अमित शाह हो'र करगंन। महात्मा मंदर दे सम्मेलन कक्ष च लग्गने आहले इस कार्यक्रम च मुख्य भरै दे सहकारिता मंत्रियें दे कन्नो-कन्नी अतिरिक्त मुख सचिव- प्रधान सचिव ते सचिवें जनेए वरिष्ठ अधिकारियें दे बी एहदे च शामिल होने दी मेद ऐ।

<><><><><><>

### **COAS Australia Visit**

सेना अध्यक्ष जनरल उपेन्द्र द्विवेदी हो'र चंडु दिनें दी आस्ट्रेलिया यात्रा पर अज्ज रवाना होआ करदे न। रक्षा मंत्रालय नै आखेया ऐ जे इस दौरै दा मकसद भारत- आस्ट्रेलिया रक्षा सहयोग गी होर निग्गर बनाना ते दौनें मुखे बश्कार आपसी तालमेल गी मजबूती देना ऐ। इस दौरान सेना प्रमुख हो'र आस्ट्रेलियाई रक्षा बलें दे सीनियर अफसरें कन्नै बी व्यापक गल्लबात करगंन।

एहदे तैहत सिखलाई सांझे भेयास- पेशेवराना महारत दा अदान-प्रदान- ते छमता निर्माण सनें सैन्य गतिविधिये गी बधाने पर गल्लबात बी होग। जनरल द्विवेदी होर आस्ट्रेलियाई डिफेंस कालेज दे कमांडर हुंदे कन्नै बी इस बक्खरी बैठक लागन।

<><><><><><>

### **Iran –US-Talks**

ईरान दे विदेशमंत्री अब्बास अराघची ते उन्दा प्रतिनिधिमंडल स्विटजरलैंड दे जनेवा शैहर लेई रवाना होई गेन- जित्थे कल अमरीका कन्नै परमाणु गल्लबात दा दूआ गेइ लग्गने जा'रदा ऐ। इस दौरान अराघची स्विटजरलैंड ते ओमान दे विदेशमंत्री ते संयुक्त राष्ट्र दी परमाणु निरीक्षण संस्थान दे महानिदेशक हुंदे कन्नै बी मिली सकदे न। एहदे शा पैहले संयुक्त राष्ट्र सचिव मार्को रुबियो हो'रें आखेया ऐ जे अमरीका- ईरान कन्नै अपने सब्भै विवाद ते मतभेद खत्म करने लेई कुसै मुकदे कूटनीतिक नबेड़े दी तांहग रक्खदा ऐ। उ'नें दस्सेया जे अमरीकी राष्ट्रपति डोनाल्ड ट्रम्प हुंदे विशेष दूत स्टीव विटकॉफ ते जेरेड कुशनर बी नमे दौर दी गल्लबात लेई उत्थे पुज्जे करदे न। पिच्छले हफते अपरतक्ख वार्ता दा पैहला गेइ ओमान च खत्म होआ हा।

<><><><><><>

### **Cricket T-20 WC**

आई.सी.सी. टी-20 विश्व कप च भारत नै कल रातीं पाकिस्तान गी 61 रन्जें कन्नै हराइयें सुपर-8 लेई अपनी थाहर पक्की करी लैती ऐ। कोलम्बो च कल पैहले बल्लेबाजी करदे होई भारत नै तय 20एं ओवरें च 7 विकेटें पर 175 रन्ज बनाए। भारत लेई ईशान किशन नै सब्भनें शा मते 77 रन्ज- जिसलै के सूर्य कुमार यादव नै 32 रन्जे दा जोगदान दिता। लक्ष्य दा पिच्छा करदे होई पाकिस्तान दी पूरी टीम 18एं ओवरें च 114 रन्जें पर आऊट होई गई। भारत लेई जसप्रीत बुमराह- अक्षर पटेल- वरुण चक्रवती ते हार्दिक पंडया नै 2-2 विकेटां- जिसले के कुलदीप यादव ते तिलक वर्मा होरें 1-1 विकेट लैता।

टी-20 विश्व कप च अज्ज 3 मैच खेड्डे जागंन। पैहला मैच दिल्ली च- दिने 11 बजे थमां अफगानिस्तान ते UAE बश्कार होग। दपैहरी 3 बजे कोलकाता च- इंग्लैंड ते इटली दा सामना होग। जिसलै के श्रीलंका च संजा 7 बजे आस्ट्रेलिया ते श्रीलंका दियां टीमां आमने-सामने होगंन।

<><><><><><>